

stà portà 600 some di grano, ma li manca danari; però se ne fazi provisione, perchè l'importa, et non sa come far; quelli fanti vol danari e hanno raxon.

131* *Di Constantinopoli, di sier Nicolò Justinian baylo fo leto letere, di 5 et 10 April, trate di zifra*, di le qual letere fo comandà grandissima credenza e sacramentà el Consejo e non se dica, pur è stà letere da Constantinopoli. Avisa, il Signor fa far 200 galie, *videlicet* 100 bastarde et 100 sotil, et li maistri si afaticano a questo; ma tien ben non saranno a hordine per questo anno per ussir. *Item*, el Signor turco è in Amasia et janizari sono molto insolenti, *adeo* il Signor non osa dir nulla; et qual Signor par habbi amazato, di sua man propria, uno suo primo visier chiamato bassà Duchagin di uno bizacho, el qual bassà favorizava, per quanto si dize, li janizari, li qual janizari li dimandava cosse molte stranie, et pareva volesse privarlo e levar uno altro per Signor; qual dubitando suo fiol unieho, ch'è in Constantinopoli, non fusse quello, mandò una vesta a donar al prefato suo fiol tosegafa. El qual fiol auta, dubitando, fe' vestir uno di soi, et de subito morite. Di pace con Sophi non è vera, ma le cosse stanno cussi.

Fu posto, per li Savii tutti di Colegio, che tutti li cinque sopracomiti aprohati per questo Consejo, qual di loro vorano armar questo anno hessendo contenti tuor l'obligation di la restitution di li danari darano a la Signoria nostra sopra i daciai nostri da esserli pagati da mo' uno anno solamente, *ut in parte*, siano li primi ad armar etc., et fu presa. Ave 9 di no, 136 di si. Et questa parte fu posta per sier Hironimo Justinian qu. sier Beneto eugnado di sier Alvixe Pixani *dal Banco*, qual à il modo, e torà il partido.

Fu posto, per li Savii, che certi dazieri di Vicenza, quali dimandano alcune cosse, siano comessi ad expedirli per Colegio a bosoli e balote, *ut in parte*, et fu preso: 40 di no, 144 di si.

Fu posto, per sier Francesco Foscari qu. sier . . . Bernardo Barbarigo e sier Alvixe Pixani consieri e li Savii, certa parte: che quando l'ocorerà alcun dubbio a terminar, contra le parte, si debbi andar per via di dichiaration al Consejo, et non loro consieri termenar, *ut in parte*, e fu presa. Ave 28 di no, 123 de si; la copia di la qual parte sarà posta qui avanti.

132 Fu posto, per sier Alvixe di Garzoni, sier Alvixe Pixani consieri, sier Antonio Trun procurator, sier Leonardo Mozenigo savii dil Consejo, che le zurme di la galia soracomito sier Hironimo Capello, che fo

con l'orator al Signor turco, per la soa disobedientia fo suspenso di esser pagati di quello dieno aver per il suo star fuora; et perchè non è honesto, però sia preso da tre in fuora, *ut in parte*, il resto siano fati creditori a l'Armamento et pagati juxta il consueto. Sier Gasparo Malipiero savio a terra ferma andò in renga a contradir; et perchè volevano far Consejo di X, fo rimessa la dita parte.

El licentiatò il Pregadi, restò Consejo di X con la zonta, et fu fato uno di zonta in luogo di sier Batista Morexini, qual intrò consier, che mai fu fato. Et prima fu posto che non possi esser electo alcun di zonta dil Consejo di X per alcun tempo che non sia dil corpo di Pregadi, et fo presa; et questo fo fato, perchè sier Donado Marzelo è di zonta dil Consejo di X e non pol venir in Pregadi, perchè acetò luogotenente in Cypri et non pol venir in Pregadi per non esser di zonta. Et tolti 15, rimase sier Domenico Trivixan cavalier, procurator.

Et nota. Sier Donado Marzello sopradito, qual è di zonta dil Consejo di X, in la materia fo tratà di caratadori dil dazio di l'insida fo cazado, perchè sier Piero Marzello era stà fato dil Consejo di X e lui non potea esser di la zonta; sichè non vi va.

In questo zorno, la capetania zeneral moglie dil signor Bortolamio d'Alviano parti di qui stata alcuni zorni a la Sensa, et per la Signoria li fo fato certo presente di ducati 6.

A dì 25. Vene in Colegio Julio Manfron condutier nostro, dicendo non poter più viver, et li sia provisto, perchè non ha più il modo, *aliter* se li dagi licentia; fo commesso a li Savi a terra ferma aldirlo et referir. In questa terra *etiam* è suo padre, qual si lamenta è mal tratato, non se li fa compir la conduta, e si duol assai.

Di Padoa, dil capitano zeneral. Come i nimici è per levarse certissimo; chi dice in vicentina, chi altrove. Et manda uno aviso auto di Mercurio Bua, qual à di Verona aver fato comandamento per eari; sichè spagnoli si dia mover. Et esser zonti apresso Verona 300 todeschi, quali vien di Bergamo per conzonzarsi con spagnoli. Scrive, come si provedi danari per pagar le zente d'arme, lauda il tuor a' nostri stipendi Malatesta da Soiano, qual ne ha servito altre fiata etc. 132*

Di Are, di sier Sebastian da cha' Taiapiera provedador, dicendo aver avisi spagnoli certissimo si dieno levar questa altra setimana; per dove non si sa.

In questa matina, intrò avogador sier Francesco Bolani.